

雪

翁

詩

集

序

魏白衣先生畊當朱明易姓之際奔走其湖海圖恢復
其行誼詳見全謝山撰墳板文及海東遺刻慈谿志專
著有息賢堂集十五卷是橐乃得之張冷僧而冷僧得
之先生族孫魏仲車友枋蓋傳家之橐也考其自序乃
稱雪巖又分卷十四題作雪翁詩集與續甬上耆舊詩
所稱慈谿縣志著錄息賢堂集十五卷本皆不同先生
手定是集於丁酉而就義在癸卯七年之中續成詩篇
不知世間尙有傳本否也壽鏞旣獲是橐更假馮孟顛

藏本參補之仍其名曰雪翁詩集嗚呼慈谿黃伯成玠當元至正閒家燬於兵退隱弁山嘯歌自適今所傳弁山小隱吟錄是也先生築息賢草堂於吳興郡城東南別鮮山之陽爲東晉沈楨沈聘避亂棲隱之地與弁山壤相接也乃有草堂而不能保且爲怨者所首身死杭州卒不得以隱終其命也夫讀其歲暮遠游與嶠嶠二稚子詩序曰覆巢之下豈有完卵理所宜然陶潛爲晉處士恥事二姓屢值凶歲往往乞食潛有五男曾不爲怨堪爲汝等標格也然則先生固欲學五柳矣世稱開

門覓句酷嗜李白誠皮相也時與唱和者有若長洲陳
三島會稽張近道歸安錢纘曾祁五理孫祁六班孫皆
一時名宿先生嘗往來澹生堂盡讀其藏書故學益進
而詩益工斯歐陽子所謂窮則愈工非詩之能窮人殆
窮者而後工歟今距先生之死二百七十年矣迴思康
熙癸卯吾鄉人死明難於杭者曰職方楊文琮曰先生
明年甲辰曰張蒼水時號三忠獨蒼水之墓歲享其祀
職方之葬謝山以爲在南屏或曰在孤山先生之葬慈
志則爲先在南屏改遷靈隱石人峯下而別爲傳者則

曰封土爲牧馬所壞好義者函骨葬之靈隱西之五寺
橋大桐陽題曰魏長白山人夫婦之墓是宜合三忠而
祀之今訪其墓猶未得也幸得其詩彙斯先生精靈之
所寄者矣爰函付梓與弁山小隱吟錄並傳而書其大
凡以哀其遇焉民國二十二年十二月後學張壽鏞序

慈谿縣志本傳

魏畊原名璧

○從弟霞撰傳初名時珩

字楚白甲申後改名畊又名

甦

○全祖望奉萬西郭問魏白衣息賢堂集書別字白衣

以世胄少失業學爲衣

工於湖州能讀書有富室奇其才客之尋以贅壻隸歸

安籍成諸生

○霞傳生萬曆甲寅四月六日年十四母未歿父君揚攜至霽川課讀弱冠赴童子

試邑人周躍雷爲歸安尹李長華癸酉鄉試所取士謁師至署閱卷見先生文拍掌謂李曰此卷宏深樸茂有

古大家風不徒爲小試冠也揭案列第一歸安士競以

外藉阻李曲全之遂入庠湖人凌某義渠從子也仰其名妻以女己卯督學許豸歲試冠軍食餼○祖望

奉薦書山陰郝忠敏公器之爲編注名諸社中 國亡棄去○霞傳甲申之變懸衣冠堂上北面稽首曰予雖在草莽然稟食膠庠亦君祿也縱不殉國難亦當

潛身遁迹爲世外閒人乃挈妻子至蓮花莊更名畊字野夫別號雪齋居士聖朝定鼎有薦之仕者再拜辭之所交皆當世豪俠志圖大事與於君上之役兵敗亡命

江湖妻子滿獄弗恤也久之事解乃與歸安錢纘曾居

茗溪閉戶爲詩酷嗜李白

○朱彝尊云白衣詩中年專學子美末年專學太白惜子

未見其止也

長洲陳三島尤心契之東歸遊會稽與張近道

朱士稚極相得因并交纘曾三島稱莫逆畊又與祁公

子理孫班孫善得盡讀淡生堂藏書詩日益工

○霞傳日與歸

安錢尙書孫允武山陰朱太保孫明諱祁侍御子班孫秀水朱太傅孫錫鬯及長洲陳三島曾稽張近道往來吳越以詩古文相砥礪吳越之士翕然稱之先生學貫經史詩法漢魏嘗就允武徵古今諸名家詩彙彙選成

帳一時名宿如虞山錢宗伯謙益山左姜侍御垓湖廣
曹翰林允昌姑蘇吳學士偉業竝不憚閒關持藁之評

選
畊癖於酒卮祁氏兄弟竭力資給之畊至輒爲置酒

呼妓而朱張數子左右之

○全祖望祁六公子墓碣銘
畊狂走四方思得一當公子

兄弟與之誓天稱莫逆畊談兵有奇癖非酒
不甘非妓不飲公子兄弟以忠義故曲奉之久之畊道

死士致書鄭成功謂海道甚易南風三日可直抵京口

己亥鄭如其言幾下金陵已而軍退畊遮道留尙書張

煌言請入焦湖以圖再舉復不克

○按祖望撰張公神
道碑銅陵軍潰或勸

公入焦湖慈湖義士魏畊遮道說公以爲焦湖入冬水
涸不可駐軍而英霍山寨尙多畊皆識其魁請入說之

使迎公乃焚舟登
陸語頗異附存之是役也江南半壁震動聞其謀出於

畊邏者益急纘曾行賄得稍解癸卯有孔孟文者從鄭
軍來有所求於纘曾不贖并怨畊以其蠟書首之畊方
館於邢氏被執至錢塘與纘曾俱不屈死妻子盡歿○
傳康熙壬寅六月朔先生與允武伏法於會城觀巷口
配凌氏聞先生死以髮自經次子嶠亦自經長子嶠成
向陽堡○畊有歲暮遠行與嶠嶠二子詩序吾束髮讀
書蒙朝廷恩澤兼祖宗以來世有顯人爲清白吏不願
屈節汝母侍吾巾櫛固當黽勉同心但哀汝等稚小無
知罹此困瘁撫頂摩挲言願涕零語云覆巢之下無完
卵理所自然昔陶潛爲晉處士恥事二姓值歲
凶往往乞食有五男不爲怨堪爲汝等標格也班孫亦
遭戍初諸子破產結客士稚首以是傾家近道救之得
出獄而近道竟以此渡江遇盜死己亥三島亦以憂憤

死○霞傳庚子朗詣卒先生偕允武自歸安渡錢江經
陵視其封殮辛丑二月與班孫錫營送葬於大禹
勸哭而去畊死山陰李達楊遷經營其喪坐遣成錢塘

孫治卒購得畊骨葬之南屏

霞傳先生一女適仁仰
庠生孫宇台之子某亦庠

生葬先生及子於清波門外西湖之山麓○後改葬靈
按谿上異聞云山陰張彬葬之西湖與此異

隱石人峰下題曰長白山人之墓

霞傳封土爲牧馬
所壞好義者函骨葬

之靈隱西之五寺橋大桐鳴題
曰慈谿魏長白山人夫婦之墓

鄞人墓在湖上者職方

楊文琮同以是年死次年尙書張煌言亦葬焉時呼曰

三忠之墓畊居茗上爲晉高士沈禎沈聘故山故有息

賢堂因名其集曰息賢堂集

息賢堂集自序息賢堂
在吳興郡城東南別鮮山

之馮子以乙酉居此地考志爲晉元帝時沈禎沈聘避
亂棲隱之山前有渡曰息賢蓋二沈名之自寓肥遯而
子既遭亂遂書其額於草堂自予掛株連之禍
草堂轉售他氏甲午春過別鮮間且再易主矣
前身乃劉楨也全祖望撰墳坂文○按畊有三月三日
夢前身爲劉公幹作七絕一首自言其

自序

崇弘後作詩若干總名之曰息賢堂詩集息賢堂在吳興郡城東南別鮮山之陽余以乙酉居此考地志爲晉元帝時沈禎沈聘避亂棲隱此山前有渡曰息賢蓋二沈名此渡以自寓肥遯之意而余旣遭亂遂書其額於草堂生平有所撰述悉以名之而詩其一也數年困迫飢寒往還吳越六七郡間身無定止往往多道途之什未嘗一日居息賢且余罍株連之禍草堂亦轉售他氏妻子寄人廊廡甲午春過別鮮問草堂且再易主然

余猶以息賢名集何哉昔漢高祖定鼎關中不忘豐沛
語父老曰吾千秋萬歲後魂魄猶應絙此況艱難數椽
風雨所託能翫然忘情乎麈麈以深山爲安飛鳥以茂
林爲樂曰息賢蓋余志也今歲丁酉將以詩問世自序
其得名之繇如此至詩之佳惡俟天下後世賢人君子
之論定蘇子瞻曰昔之爲文者非能爲之爲工乃不能
不爲之爲工也又曰古之聖人有所不能自己而作故
軾文至多未嘗敢有作文之意余謂詩亦猶是也苟無
所爲而爲之雖擬議盡變曲肖曩篇無疾呼痛僞託可

笑故余之於詩初無矜飾務達其情凡博奕飲酒朋友
酬酢以至山川風俗城郭之所歷覽遺跡之所辨證雜
然前陳有觸於懷發之詠歎以爲合於作者不能自己
之指此則余之所自道也六月二十六日雪翁自序

雪翁詩集目錄

卷一 五言古

卷二 五言古

卷三 五言古

卷四 七言古

卷五 七言古

卷六 七言古

卷七 五言律

卷八 五言律

卷九 七言律

卷十 七言律

卷十一 五言排律

卷十二 五言絕句

卷十三 七言絕句

卷十四 樂府

卷十五 五言排律補遺

卷十六 附錄上

卷十七 附錄下

雪翁詩集卷一

五言古

明慈谿魏

田園雜詩四首

冲齡慕顏閔四十無所聞撫志感植葵
道得性行雲
往旣爲痛戒來復餘悶空期達者堂
著作仰獲麟
眇默謝昏墊周覽返吾真
交徒散江宇命儔布金園
西嶂逼故晦東巘爽
朝暎偃林媚素藟濯川
玩紫鱗非徒滌輪鞅
寂妙亦以論狂歌直接輿
再宿還再信

又

羈憂尋屢續積憂如川坻憂歡難並託遐齡詎可期萱
蘇稍析煩登躡庶解頤策馬越郊坰鼓柁蕩瀾漪騰波
魚鱗鱗攀條猿淒淒海陸遵未訖勞愛賞已離勤農懷
田峻迴轍觀畚菑起墜疏陳根耘苗戒化茨食場吾何
慕鑿井願無違綠桑翳負郭青陽娛晚時幽抱協清曠
植援爰在茲

又

出城眺西岑躡步凌巖壑飛館抗青冥疏渠鄙白鑿漣
漣循階鳴渙渙瀉雲落密篠迷樵蘇春條榮沃若豈必

麋懸庖何羨玄投閣眷月明孤景惜日凜素託金經樂
我懷丹液腴我澤解帶追上皇外物詎能鑠

又

西疇慶高廩蟋蟀休農工天清邱隴曠隈隩亦解蒙皎
潔升霜兔叫嘯戲春鴻覽化妙眾賞釋絆豫微躬登樓
遲佳人臨江望濛幢披蘿若在翳秉簡竟靡從傾崖仰
崢嶸俯潭窺澄洪石垂唐堯髓著搖伏羲叢幽興無與
索陵緬誰爲同心契警新悟智開舍舊通欣戚理雙遣
沈冥推無窮

靈鷲峰靈隱寺讀書詩

澤雉游山梁豈慕園林棲逍遙雲外鑣
闔非所期所期在嚙嗥怡志謝磷緇矧此靈鷲峰
靈異夙吾嬉左竦青蓮宮右瀦璇璧池
五色映喬木瑣細羅丹崖投簪仲春爛愛日
孟夏遲微析楞伽奧宏窺墳索奇餘欣攬眾
芳攝生掇玄芝葛仙爲我導許公爲我師
汲泉鍊玉井引嘯授丹圯濛谷送陰魄海門迎晨曦
澄心歸縣解情愜且猶夷

乙未七月二十六日郡城西蓮花莊寓齋作

蓐收迴金馭祝融火猶燠秋陽鑠肌膚無異炎洲縣裸
躬窄構櫺承握疲葵扇孤客痲樊籠游子蹶塗炭眊眊
首邱慕悄悄朋儔眷兩懷俱在纏憂來故無畔蓬頭像
黃霸滯跡似王粲旣思繁子孫復苦營廩膳撫兒嶠與
嶠何時遂婚冠嬌女憐纖縑何時詠鳴雁支離歲易逝
循環情彌縑皇穹數陽和橐籥齊吹萬恭己不忤天赴
物蹈眾善神理當有凝衰榮隨所遣屏氛山澤游戰勝
舒良玩

擬古

三十染篇翰苦爲儒冠誤四十授素書經略昧世務自
媿筐篋才偃仰就園圃前有濟時客解軫迴中路陳醴
獻葵羹哺用乏良具竦盼激青雲流目哂我度富貴人
所榮道德人所慕君子懼兩端我願守我素

贈錢肅潤

扶桑海水波燭龍光景微蟾魄相淪惑天地紛無禱蒼
梧狩不還烈士志亦危喟然起西游汎舟昆明池黃姑
不駕箱織女縑靡儲陰風晝夜興卉木頓已淒撫躬懷
洛邑頑民良足悲遯匪依巖穴散髮吟郊畿漆身餘隱

痛蹈則陷焱機二心何所愧慷慨欲報誰令名榮丹青
丹青未可訾商山遺素風終南多佳期深谷路匪遠玉
液可療飢行將憩我轍斯道倘能追

贈李侍御模

白馬望吳門清渠周遠郭山川邈用睽游盼安所託
蛻竦經長天淫雨灑飛閣河洲鶖鳩鳴芙蓉日零落躊躇
玩薜榮徒倚芳蘼薄緬想東陵翁灌園井自鑿雞跖曾
無慕旨此葵兼藿懷仁有休侍履義諒無惡何懼重陰
密氛禳滿寥廓君子安固窮忠信行蠻貊余也雖不材

持躬敢匪恪

送胡介

薊門不可行北望使我哀
冰雪截馬角狐狸馳蒿萊
山岑造雲起洪流何涸涸
猿狖駭崩岸鴟鵂鳴林隈
宿莽塗人腸行路盡徘徊
奈何遠游子將赴軒轅臺
出門辭親友顧泣離袖揮
觸目見俘虜纍纍隨兜魁
何鄉無樂土跋涉從南來
念君此行役冥冥心脾摧

送姜侍御

奉檄辭嚴親佩玉謁承明
朋儔遠追祖謹譁填吳城
車

騎四面至逍遙影華纓鳴笳導輕蓋廣樂臨洞庭望舒
次水裔連耀雲間星葭蒺隨風靡龍鱗波徐興凌洲矚
別浦宿雁參差鳴丈夫居津要誰不希榮名濯磨玄璆
美庶幾獲我情

贈姚宗典金俊明

亶亶觀時運塵埃扇且浮飛步追逝景青陽安可留大
儒儲德義薄俗積愆尤處世尙明敏礪躬親朋儔不見
鷓鴣鳥睨皖會有求昨讌城西隅慨與數子游我寧無
他寶傾蓋雙綢繆薦蘿故依松葛藟自榮樛萬物緣天

性竭情詎足憂翩翩相容與偃仰息丹邱所愧乏璜珮
永爲君子投

寄贈陳三島

芝蓋臨東園逍遙散瞻矚寒澗繁雲興涼風起陰谷蜻
蛸扶庭吟哀蟬悲叢木羈客本多愁懷人益淒促嗟君
美才彥沈疴臥蓬屋拳帷對孺人空房秉華燭圖史紛
就陳四顧靡展讀焉得赤石英令君豐肌肉世路若浮
塵時事崇反覆達人信天命養心在寡慾微詞遠莫宣
延頸聊躑躅行當采其蝨陟彼北山麓

寄訓孟遠

秋飈鳴爽塏宵露承簷滴明星河漢間纍纍如白石慷
慨懷所歡風義敦在昔握手常相親迢遙今爲客山川
雲霧漫杳杳天無極貧賤傷枯槁富貴豐膏澤嗟彼桑
戶儒甘心不謀食蔡澤西入關何必慕秦德譬玉出荆
山良賈售其值願因北風起厲哉振羽翼

贈陸嘉淑

種豆南山下豈必連陌阡結交四海內豈必盛輜軒文
夫貴適已汎愛奚取焉昔余鍊玄液抗襟大滌山情盼

如雲合今來期屢愆道遠日月邁苦懷慷慨言路險知
騏驥世僞知聖賢美玖示良工展翫識其然伊余頑魯
質龜勉追不前應門閉重闔明燈曜芸軒新文遙有贈
贈子松柏篇

寄張近道二首

禍亂昔崩虧神鼎以沈淪中州寡安壤江介無逸津汎
泊周八極俯覽蠢茲民蹠之必糜爛擾之則陽春壯志
徒嘈喝猛氣空雷震朔飈零露急涼暑銷火燄梧楸就
林衰衢路揚埃塵吁嗟漆園吏毛褐終其身我欲赴溟

渤窮源溯崑崙觀彼鵬所化悠悠養靈椿

又

海水怒澎湃猛獸駭其曹撫劍而太息躡步空嗷嗷陰
陽燭靈運忽若隧風飄我聞棘津叟屠釣奮熙朝吐吟
懷王佐厲夜氣蕭條御軒觀景星北辰何其高隆思誰
爲馳染翰展鬱陶吳起適大梁商鞅躍秦郊彼皆羈旅
客努竭解所嘲抗顏雲霄間俯仰激長謠

贈朱士稚四首

飄飄蓬科轉汎汎萍葉傾驚飈忽焉急離合諒難并昔

我從君役總轡石頭城
曄曜帝王都
員闕浮泰清
鶴鶴薄雲翔
江流皎且澄
結交參羣彥
華館燿明鐙
謹譁騰逸爵
曲度娛悲情
故人今已睽
迢遙隔紫荆
陶陶方仲夏
草木鬱以挺
我懷誰爲舒
瀏覽篇自成

又

端居念在遠
故人毒我腸
覲面未始懽
隆思別後長
誰云江介邇
咫尺不可方
濡毫染彩繪
徒倚增迴惶
扣舷出西郭
舒嘯適濠梁
鱗鱗迴成侶
於物躍金塘
潭潭水中坻
游戲雙鴛鴦
菱芡冒沈浮
菡萏流芬芳
渠漶互灌

注榆柳夾魚防炎伏雖蘊隆風至自生涼人無延年術
隨時宜樂康鄙願既有涯胡爲常惻愴

又

慷慨慕八埏結志凌三湘眷言采蘭茝編輯爲我裳翟
公兩走馬屈宋道毀傷二儀迭淪蝕哲人多喪亡攬涕
東門歎霑襟薤露章竄身苟存活與汝共翱翔天地誠
遽廬偷蔭亦非臧黽勉各努力奮迅在陳嘗升沈異塗
轍爲德自芬芳

又

吾無濟時策整駕歸北山雅懷敦典籍蘊憤託寓言寒
暑雖流易俛仰不徒然談笑欲有酬勞勞阻河關庭榴
下翠鳥林樾映檀欒蕭條委巷中據梧復憑闌據梧詎
云適憑闌匪云懼歌謠代行國慷慨振纓冠矧我蓬蘽
姿所志在苟全

酬贈潘時升

行行棄越土竄身白蘋洲中更嬰禍羅去家日以浮一
蹈瑣尾危如鶩傾轅軻翩躚列仙子披被丹霞裘奉籙
文昌殿執籥扶桑邱何意忽來會集靈我庭陬貽我補

腦方情盼渥且周誰謂駒在門相送成遠游今來返故鄉安知歲月道素葉飄西陸明星隱南樓童童渠上柳倏忽鳴春鳩人情窮側左竭誠者無尤辭翰流榮觀束帶敬來訓

寄呈靈巖繼起禪師二首

古城臨洪波朱曦停虞淵俯仰何淹留淹留此山川紛攘感時命汲汲無與歡帶索行且吟肅侶恣游盤東皋巾柴車徘徊隴與阡時苗何或或瓜瓞被原田薰風自南來薄木柯條振蟪蛄紛已夕歸鳥鳴翩翩顧懷中阿

人巢棲無歲年衣薜披女蘿芝朮以爲餐
芘芻滌塵網冥寄寶忘筌身世兩捐棄
委運天壤間廓矣返寂寥安測玄中玄
庶有鹿門期高崖仰可攀

又

在昔聞庖丁揮戈洞理因輪扁棄糟粕
神穎亦靡倫皎皎大比丘治鑄握洪鈞
旣非寰中客豈名世外臣靈谿挹丹溜
息意玩天真我願游其鄉解駕濯玄津
共尋石門道振策高峰顛長嘯巖竇朗
逍遙歷荒榛藹藹絳雲卷冉冉白日淪
長想攬大象髣髴宛已存浮生頽若燧

火流歟然薪詎能乘尸素喪逐野馬塵厲志思所託悠
緬希嶙峋懷哉飯至德至德固有鄰

雜詩二首

烽燧舉不息邊城殺氣昏鳴鏑風颼颼雕落如車輪燒
我敦煌郡鈔我廣武屯沙鑠蔽漢月陰雲起胡塵斧鏃
貫丁寧自卯行及申轉戢七十二執訊還都門士女盈
道傍誰知予苦辛

又

愚人寶燕石不知荆璞良下里愛款段寧識代馬疆不

逢黃虞世騶虞誠不祥仲尼行適楚七日畏於匡伍胥
諫勿聽獨鹿化吳江倚嘯上東門坦步歸高岡

寓懷四首

荆軻俠烈士其意輕燕丹車騎及美女恣取供敖般瑣
細豢養具寧足結其歡是非田先生一死要所難烏肯
批秦庭慷慨白虹貫臨風坐相激矜氣凌雲漢至今過
易水壯髮猶衝冠誰謂非泰山比之飛鴻翰

又

潛穎濯幽厓陽條晞嶙峋物生成有命榮瘁相依因嫫

毋驕衣錦西施行負薪巢由謁軒冕夔龍困風塵由來
得喪間側足增迷煩彩虹帶清昊華星出浮雲天雞鳴
海滋孔雀飲江濱拂劍歌桂樹逍遙投吾綸

又

淮陰年少中韓信抱奇才泗上風雲起漢王從西來一
言佩黃金搏擊橫埏垓輕蹙重瞳君談笑瑯琊臺分明
鼎足資器小無取材終身感衣食竟爲漂母哀何如安
期生焚書怒秦灰挾策不見收吸景空山隈至今千載
還縹緲在蓬萊

又

標鹿不可追擊壤安能游福輕洵毛羽禍重積山邱鳳
凰覽德輝何處尋芳洲鷓鴣銜禾葉衛身智已周豈若
荷蕢儕逃之無人幽歲星潛金馬步兵醉糟邱出入塵
鞅中世網誰拘囚

蘭皋集詩

荒塗露晚彫蕭條歲云晏縱橫靡所託婉轉去鄉縣迢
遞結同心契闊相諍譙割鮮膾牛炙臠肉羅豐腆奏樂
雜宮徵羽聲誰不變仰視雕鶴羣乘秋凌雲漢低頭念

游子惻惻中心亂

寄沈士柱二首

縱轡觀廣武豎子成令名烈烈感時運慷慨墮長纓朔
風橫地起猛獸山中行海鶴警秋露蟪蛄連宵征出門
西向笑歸途還涕零終年懷尺帛斗粟常不盈

又

生命不常固天道不常親操刀擬不割無以握絲綸志
士貴決機盈縮在一人何須慕黃唐揖讓相逡巡區區
仁義言豈足束其身

擬支遁四月八日讚佛詩

炎精排春飈仲序育朱華世珍青陽際業崇玄會奢大
覺調御師應期乘絳霞神景煥彩庭靈顏一何葩傾柯
芬陀榮白毫感四遐欄楯交珠網凱風奏陵迦紫霞灑
芳津甘露霈璠沙祥祥升堂肅疊疊欽儀嘉道爲默者
授神爲恭者加恬愉研寂妙夕惕承聖化塵刹攝毳軀
萬劫鍊無邪稽首東旦洲圓光倚委蛇銅池挺玉芝淑
氣相紛拏濯陰汗漫府騰波濟虛查願奉解脫寶六度
拯恩河超拔下務尸游遨覩史陀

擬支遁述懷五首

斂神玩靈府振褐披冲玄
同同幽室中暉暉想層巖
負笈尋妙德共調無爲絃
晨起陟萬塗夕駕周三天
鬱嵯見雲樓排虛臨重淵
傾崖逼風霄市地攢嶽蓮
解輪息噉囂頓策離塵荃
仰嘯若木林俯漱飛蕊泉
至人時往來咄哉皆金仙
煩情隗隗頽大智蕩蕩存
漏盡證泥洹泥洹得自然
翱翔隨宇化竦眄彭殤間

又

歛駕玄圃北崇阜拂玉清
旣汎琳琅谿復陟絳芝城
仰

止懷榮松徧游嚼芳蘅顧盼出廖廓靈臚乘和征至樂
無橐籥吹萬自然鳴不覺沖曠怡吐納融煩醒拊吟太
上篇流詠阿含經至心感大匠令我返黃庭神條絲絲
秀玄根恢恢生薪窮鏡不滅無得故無傾

又

天地日淪剝囂聲日侵附千齡須臾移萬紀如電過濁
途戀榮競濡首蠕蠕地玉爲塵土幪灼灼永潛翳林木
無終暉繁葩肅秋厲往者不可追來者猶可冀騰躍戲
玄津皎皎黜疑滯游神兜率天棲形海嶽際對虛連肘

化運斤赴容裔沈寥無身道且暮庶一遇

又

縱躡驚塵鞅駒邁鬣角年曖昧櫻長羅忽此玄中玄迴
轡攬大道長揖駕紫煙振嘯雪山頂拍浮崑崙淵逃名
劣巢許戀魄鄙偃佺曠觀形骸外廣漠樂靜閒怡盼釋
千歎朗煥燭八埏游悟既高妙擾競總不遷劫盡天地
傾靈扁常洞然

又

熒熒夸毘子篤信在煩囂紛紛苦猶豫冥冥俗慮搖安

能澄滓穢元氣薄清霄在昔有化人白馬騰漢朝遺經
變化綱崇規攝形條扶我寂滅輦導歸鄰虛舉仰望升
堂賢沐浴警三焦進卽玄珠獲退必無纖毫保則神充
寶替則行尸勞

游仙三首

九陽耀闐闔玄螭鼓洪鈞協風扇太虛順氣翔天垠馮
夷游大川上元襲崑崙真人得靈寶上揖東林君擲神
煥霞邑晞髮天河津仙伯皆蒼牙與我笑齷齪鳳腦剖
良宵瓊腴漱清晨奏璫闔霄闕嗽嘈薄星辰世間啁啾

聲瑣細安得陳

又

太和鍊我氣金液鍊我形朝登真人籙暮游白玉京唱
導萬靈上舉體雲霞輕駕驂麟洲鶴飛集赤縣城金銀
如嶽積髑髏相拄撐野馬逐醯雞前感續後生奔競百
年內坐地割奇齡誰能要丹訣啟悟求良朋至心澄寶
訓邁俗栖巖扃

又

璀璨望舒宮中有玉蕊淵左注桑林并右繞紫桂壇雲

闕自然構我我擁眞官素女鍊神藥願免擣靈丸俯矚
地仙輩一似鯨與鱣寄遨隨頽波永劫不得旋至道豈
難尋所貴在存玄振衣從我游逍遙排芝田

初住茗谿與鄰叟山行過張醇別廬置酒

茗谿勝剡谿鳥鳴春復幽草生明月峽花滿銅峴洲相
攜鹿門侶結廬臥崑邱清晨出門行卻披紫綺裘杖者
四五人與我同遨游遂酌張野叟登其池上樓天目雲
外秀笠澤天邊流暮雨向之來窗竹颯鳴秋頽然不知
返行樂何悠悠

歲暮遠游與嶠嶠二稚子 有序

吾束髮讀書蒙朝廷恩澤兼祖宗以還世有顯人爲
清白吏不願屈跡虜庭自甘窮餓汝母生於富族亦
粗知大義旣侍吾巾櫛固當黽勉同心但哀汝等稚
小無知罹此困瘁撫頂摩娑言願涕零語云覆巢之
下豈有完卵理所自然夫何足怪昔陶潛系出長沙
爲晉處士恥事二姓屢值凶歲往往乞食潛有五男
曾不以爲怨堪爲汝等標格也歲暮冰雪吾將行矣
繫惟二兒勉焉

遙聞廬嶽秀欲臥香鑪頂瀑布落九天巖樹啼猿冷道
遙叩東林耽玄冀深省將發蒲帆塘僕夫駕已整出門
復入門行止戀俄頃紅日銜海山白雲生湖嶺把袂佇
西風珠淚雙雙迸

湘湖游眺

渺然湘湖裏西望富春山雲景鮮且秀彩翠雙眉彎迴
潭下石壁層谿接潺湲村村攢雲樹處處眠白鷗遙見
隱居者臨流采芳蘭願言邀丹術餘光駐顏顏谷口弄
明月棹歌不能還

泛舟從山陰抵曹娥百四十里山水作

觀濤樟亭北挂席禹穴還歷歷當清秋一一似三山恍
惚駕巨鼇突到蓬池間宮殿三千所璀璨都可觀游行
多玉女折花調笑顏峰明白雲靜水闊鴻飛閑窮源覽
眾化擁楫溯迴瀾清暉娛幽寂佳趣落天關狂歌歸去
來誰能憶長安

游天竺寺寄會稽姜廷梧

昔聞天竺寺夢想瓊瑰厓上攢青青林下垂紅蘭花由
來無人往勝蹟徧巖屨三楮興忽發揮手登雲車獨往

始爲遂昇頂弄煙霞俯窺葛洪井至今流丹砂仙真鍊
玉液黃姑摘瓠瓜敷玩多妙理昧者自紛葩寄懷剡溪
子何時乘海槎共修羽化術干春道非賒臥聽天雞鳴
相將攬日華

金陵沂流過白壁山翫月

補

我愛金陵江瑟瑟明水玉況沂白壁岸秋月清可掬銀
河掛碧峰搖波蕩層綠照見牛渚磯不用然犀燭客吟
山鷓鴣疏籟振林木長川寫幽懷何殊淶水曲醞酒芙
蓉深斂袂露華溥留懽待天曙且莫悵行役

送祁班孫過蕭山問徐芳聲李文達二子

補

昔聞許玄度歎息蕭然山至今滿城郭蒼蒼白雲寒
今君採菖蒲如到九疑間落帆固陵渡明月照潺湲

又

補

蕭山有隱士築室蕭山巔門覆惠連櫟井開靈運蓮
此中多佳趣獨往誠高賢倘君灑飛翰一枉霞上篇

天門山浮舟望金陵

補

朝辭茱萸浦暮登天門山天門三千丈杳在白雲間
白雲望無極茫茫江水碧江是錦江來尙餘濯錦色
擁棹

溯江流逶迤眺石頭日落鳳凰臺縹緲鳩鵲樓雪明雉
堞絢蕙芳渚激幽還隨鷗鷺轉清楓正修修獨酌對兩
峰海月生孤洲緬懷古賢哲耿耿使我憂

贈吳生

羅含記瀟湘遂客巴陵州子山賦枯樹亦向關中游從
來賢達士何曾戀首邱延陵貴公子被服貂鼠裘結交
皆豪傑恥爲兒女謀南海出珊瑚若耶練純鉤珊瑚廟
廊重純鉤龍用優黃金散還合窮途安可愁投詩貽燕
甸縱酒晤蘋洲攜手一相豁笑上芙蓉樓

雪翁詩集卷一
五言古

雪翁詩集卷二 五言古

明慈谿魏 畊白衣撰

短歌行

蟾蜍虧陽精浮光一回促我願游扶桑解帶挂若木飄飄魏元君相遇白雲中雙手弄流電鞭海起蒼龍回頭顧我笑婀娜開心胸神飈催鳳駕導從還玉宮頃刻霞路滅躊躇悵煙虹歸來還對酒撫景鳴絲桐

宿梅市祁氏別業醉後就枕忽夢游天童謁山翁
和尚并終朗楚莫兩師因風有寄

浮舟訪梅生還宿梅生宅玉井菖蒲叢映階搖碧色溪
禽繞棟飛萬山日醉夕酌酒遂陶然高臥北窗北薰風
拂綺琴涼月流枕席忽夢天童寺因游太白峰樓橫雁
蕩雲門對阿育松下有金仙子曼笑相從容我戴華陽
巾趨謁蕊珠宮攀崖竹篠密穿林花氣濃昨來雷雨過
流水尚淙淙寐起失所往故境猶臃腫何當攜謝屐星
聞南鳴鐘

早過相城因懷姚少師廣孝

海門日未出天雞三四鳴浮舟下姑熟歷歷猶明星豈

爲尙書顧官冥向東行碧草搖湖光曉色涵空青雲開
相城野處處荷花生扣舷謠美人風至有餘清因懷一
匡業慷慨振長纓少師不可再醞酒還自傾

鏡湖二首

言尋麻峴溪還訪櫟潭來沿溯至鑑湖百里澄流開遙
岸秀喬木羃歷映雲隈帆迎樵風轉趣繞明霞迴鷺鷥
隨人飛皋隴起雉媒維舟望前林欲上越王臺月吐海
雲端對月清徘徊結桂思韓終折麻想方回空山徒延
竚猿狖增悲哀

又

夙昔愛鏡湖欲買賀公宅
敕賜臺沼榮丹井有遺跡
想見解金龜青蓮呼狂客
今我仲夏來齒蒼滿湖碧
雨散千峰明蕩艫恣所適
傾壺就淺沙題詩掃白石
嫋嫋披雲蘿陶然日已夕
何必游金華騎羊赤城側

仲夏月湖館思雙髻語風院舊游

至心思餐霞遨游千餘年
未得王母驕時邀羽人
憐歸來月湖館跂腳北窗眠
蟬鳴梧樹枝流響和哀絃
涓涓俯清波我憶高山突兀
雙髻峰何異浮羅巔迴溪注

白雪沓嶂橫青天我行自春暮桃花正欲然密篠無行
徑飛夢有黃緣星星聞鐘聲遠出杳靄間策杖凌石室
曇摩相追攀美此高蹈意夙昔羨獨全願效謝客兒再
植秋池蓮

與祁五兄弟泛鏡湖

鏡湖明綠水通塘羞見之白沙傲霜雪皎潔映鷺鷥草
木攬靈秀崿嶂眺屢奇予未值五月興趣正愁絕荷花
搖兩岸蕩漾繞雲物湖自賀監清興是二祁發登臨澹
忘懷蒼茫送落日惜無王子喬控鶴下絳霄雙雙垂素

足相與吹洞簫棹月且歸去還過南渡橋明發上華頂
試覽赤城標

贈李翰林長發

苦縣有李耳騎牛出函關空餘五千字能開天地顏君
是玄元後清詞超煙寰然諾羅英俊吐哺不及餐落魄
游吳楚木脫江上寒而我玉清謫飄飄鬢已斑願爲安
期生長嘯浮雲端忽然白日沈天關不可攀高談若粲
花時俗非所賢仲冬錢塘門踏雪鞍馬還含笑攜素手
爐頭盡醉歡華燭儼相對歌鐘星漏殘明發別君去把

釣滄浪間

還別鮮山寄馮徵君元仲

引領青山歸白鳥飛還滅抱琴松下彈寒露溼秋月我
來幾何時停舟已昨日孤懷清有餘發興事非一陟磴
攀桂枝傍崖采藜菊曠懷起長嘯徒侶趣奔悅緬懷赤
城駕冥心坐超越窈窕望東瀛石華未可掇

靈巖四首

吳中有仙山可望不可攀皚皚石如玉何謝麻姑壇我
夢登其峰舉手明月間瓠瓜若可摘恍惚越九關露下

天始秋羈客適見還湖波蕩霞流花雨從風殘碧空送
歸雁嘹唳沒雲端故鄉腸斷處落日正西看

又

峇堯青蓮宮獨往謝城闕翠微橫鳥道靜域人煙絕凌
夜登琴臺曠懷攬孤月澄湖眼前流洞庭皎若雪側聞
天樂來嘈嘈碧雲發天香清人襟湛然生禪悅終當事
瞿曇宴坐消永劫

又

洞庭秋雨來澗花鮮且香長老清磬罷談笑聊徜徉遠

岫霽在眼碧天浮遙光彩雲鷗外飛水色疑瀟湘澹泊
寫我懷真寄皎空王深院閉修竹脫屣上胡牀蕭條理
章句幽趣一何長

又

雲生有起滅我心本湛然會得粲可趣屢泊雲窗眠夙
具栖山志江海不及宣今遂捫蘿好樵牧開山田因之
桃花飛坐汎湖中船戚戚念故侶悠悠懷前賢極浦搖
煙月鸞鶴情邈緜拂衣歌歸去書此霞上篇

贈劉雲

劉生曠世才邁往足驅馳經義疏春秋文章擬楚辭末
俗輕風雅多爲行路嗟早聞宣城居浩吟謝朓詩門羅
敬亭秋松月步遲遲高興歷天竺雲帆無還期我固紫
煙客野鶴任所之昨來櫻梅候今已鴻雁時霜凝金井
上葉落梧桐枝且典鷓鴣裘旅館慰相思終當發剡中
言訪洗屐池

登吳山望浙江懷古贈董以寧

峇峇吳山頂登樓觀浙江驚濤雪山來拂面若飛霜游
子天地間壯懷迴景光俯仰託末俗體骨多摧殘邁往

激清風攬袂送斜陽茫然巨鼇沒歸鴻薄天翔在昔聞
嬴政好奇心飛揚日觀回駿足浮舟下錢唐欲采蓬萊
藥飄搖達帝鄉射波魚眼紅沈璧海水蒼我曹今何似
窮轍哀佯狂渭川不可渡襄野亦已荒但慕白雲篇瑤
瑟彈扶桑

酬張杉

飄飄天地間邈若洞庭波寒蟬與落葉其奈秋風何拂
劍事遠游舉手謝雲蘿駿馬龍文脊蹠躩渡黃河雞鳴
近皇州垂柳鬱婆娑結交皆豪俊珊珊佩玉珂錦衣賜

顏色進酒命雙娥一朝倏見遺山上颺吹過功名不自
立寵顧豈足多桃李失陽春年貌已蹉跎何如鍊內景
羽翼升大羅

宿天台桐柏觀寄雲靈先生姚尙靖

晚投桐柏觀已流赤城月羽人邀我游披襟采爽悅迴
廊掃松梢石鼎茗可啜清風至徐徐陰蟲聲切切彈罷
蘇門琴孤懷轉幽絕登嶺豁長嘯觀崖驚飛雪天雞鳴
海岸紛吾復東出霜露野中飯黃精會當掇曉夕望洞
庭雲濤遠明滅

酬蕭台州亮

勾漏有丹砂葛洪拂衣行金瀨嗽乳液倏忽羽翼生碧
霄十二樓迢遙臨玉京攜宅來此處下視惟青冥蕭公
神仙吏剖竹台州城五日獄訟決十日風化清拄笏看
西山爽秀不可名一朝世事殊落魄浮東瀛蕩波鷗鷺
沒倒景雲霞明握手浙江頭盈盈兩含情笑上酒樓去
呼妓彈鳴箏濁醪可以飲安問醒復醒

秋夕飲越城沈九胤范最高樓留別

休文耽逸調獨坐嘯南州宅近范蠡城中最高樓環

嶺入遙澗平楚散良疇昨者月華好邀我樓上游酣歌
竹枝響揮杯天河流竟夕露氣清何異雲林幽終當下
茗水挂席峴山秋踟躕不忍別秉燭仍夷猶

中秋藏書樓置酒對月醉後示祁五

皎若盤龍鏡碧若瑪瑙杯欲邀此月光舞蹴起徘徊況
登高樓上置酒涼風來銀箏彈急絲玉笛橫落梅四座
飛觥籌妙曲還相催醉罷酬清論揮麈大言開君看我
豪邁何如袁宏才飄飄牛渚詠緬懷鳳凰臺豈必庾元
亮乘月朗嘯迴我願駕烏鵲濯足天河隈

剡溪招朱驊元作

行徧女貞林徒羨長溪碧豈無黃精草遠贈紫煙客
伐木登鵝峰弄琴潭水側藤花落紛紛磻戶幽且寂
何時一瓢酒與君永晨夕興來摩崖還留此綠苔跡

梅市送愚庵和尚還橫山集福寺呈西遯先生祁

超

昨經龐老宅飯僧供紺蓮吾師雖沙門能爲儒者言
脫略時世拘貴愛魯仲連側聞橫山頂精舍在其間
翠微藹沈沈遠嶺秀絲絲榜簷有石洞如雪鍾乳懸
陰風晝

常集涉暑可以眠扁舟今歸去拾月遡前川白雲若有
贈遙望虎溪煙

秋日登下山玉樓峰後寄剡中周三懋宜作

清秋昨登臨卻愛玉樓好澗中石磊磊而無行車道霽
色起澄湖涼風發長嘯若非弄白雲何由見幽操歸來
閉荆關焚香事灑掃日夕懷山川煙霞興浩浩引領望
飛鴻攜誰訪海嶠惟有剡中人鳴琴可同調

與朱四角調過瓜渚湖作

鏡湖若耶東澹澹生菱芰我是洞庭來已窮水鄉趣所

未涉此湖擁楫故難去鷗鷺乘匹飛時鷲四峰翥越女
嬌浣紗解佩玉珂處白雲卷還滅青山晦復曙何當邀
祁六載酒共游豫

紫芝軒對雨書懷示祁五

谿邊娑羅樹角巾散行樂歸來奏薰風祁五有雅酌飛
雨從西山荷氣涼滿閣雖無雲門深居然已邱壑紫鷲
翳鳴蟬白石下秋鶴解帶滌煩襟中懷祗憎惡曾齊物
論妙世喧頗脫落明日飯僧去更著阮公屨請君愛沈
冥勿疑吾寥廓

憶息賢草堂作

秦望白雲裏，卻憶別鮮山。草堂在其下，秋風吹未還。
松露彈弦響，草蟲鳴瓮寒。遙憐稚子弱，竚立候頽顏。
惆悵無心月，柴門不能關。

宿桐廬江寄顧二處士有孝

連潮江愈寒，知宿天邊驛。月出桐廬尖，照見未歸客。
風傳城漏疏，巖挂栖猿白。俄然愁滄波，佇想飛鴻翼。

南軒述懷

山鵲下梧桐，涼風吹白谷。去來候沙門，玄言景芳躅。
雲

窗屢不關軒堂敞林木石壁汲暗泉厲夜然楚竹巖中
歲月疏羈此趣頗足遙憶湘夫人愁見江草綠感懷鳴
玉徽長歌采薇曲海月吐半規徒然照幽獨

旅堂秋暝待朱士稚不至

荷枯池雨漫螢翳秋草深長風吹日暝雲物罷登臨汲
泉寒山裏待月玉堂陰漸聞暮聲息遙送風中琴寂寥
懷梅尉荒途有知音紛吾邀鳴佩隔此天姥岑
泫露溼修袂躊躇望竹林如何贈雙鯉去去紫解沈

茗南秋日齋中讀書寄嘉禾朱十彝尊

澄湖晦煙霜橘柚森晚照彩翠紛吾前臨風忽獨笑遂
校石渠書而愛太上道雖與賢聖殊精微羅至要恨無
終南隱迴牖證其奧悄憶蘆中吟飛鶴遠相召昨聞勾
漏回應識丹砂妙山中倘見遺爲君泥丹竈

日夕山中忽然有懷山陰道士徐真誠

恥爲章句儕不喜弄文翰沈冥土室中抱膝怡水觀鴻
雁鳴秋節始知韶華晏返照翻樸林飛簾滿蔥蒨散行
著葛巾山梁有餘玩暝還竹樓宿徑轉松雲斷忽憶籠
鵝客遠隔山陰縣朗吟步虛辭欲贈謝公扇興來擬登

艫恐值剡溪霰

南樓雨中望鑑湖作

蒼茫寒雨晦何處散愁疾况我離故園已是清秋日登樓望鑑湖臨風陶佳節翻翻水鳥飛時時遠嶠滅雖有芙蓉花妍姿爲誰悅渺聞漁子歸浩歌弄舟楫滄洲倘見招持尊候蘿月

越中羣公宴別

余欲訪紫陽將爲赤城游是時七月中風物方驚秋羣公相祖餞乃在葢山頭哀管間急羽妙舞迭清謳不知

王逸少蘭亭得比不酌罷上馬去夕陽忽西流翹首望
南雲飛鴻起滄洲

題戴山戒珠寺

五游苦竹郡戴嶺曾未登昔聞王右軍於此闢檐楹一
朝化精藍千祀貽佳名我興去秋發魯酒今誰傾況有
籠鵝癖寄懷在黃庭羽人太白來一笑還相迎苔深指
石牀廊迴歷雲屏紛吾感逸氣攀踐趣愈生偃蹇倚桂
枝眺聽眦體輕鏡湖杯中碧秦望肘底青煙暝策歸騎
烏噪夕陽城

酬姜十七廷梧送歸苕溪之作

公子餐霞客每泛桃花津家住漁浦口喜與幽人親秋
風昨夜起絲管橫相陳殷酌我酒送歸苕溪濱苕溪
在何處一望迷煙雲遙遙挂帆席幾日到柴門童子掃
竹候田父荷蓀詢芋羹飯香稻蔬盤薦紫鱗小隱諒如
此爲歡未可論感君滄洲言無由贈采蘋還將別時意
再拜書之紳

八月十三日晚同西遜先生祁超及諸阮汎鏡湖

登彤山亭子

叢叢蔓紫葛搖漾寒溪流日日把道書高臥不梳頭閒
卻一雙屐未解彤山幽晚來雨新霽先生攜我游水檻
傍澄碧停楫在沙洲數鱗潭上酌望嶠松下休憶昨泛
湖役無如今年秋夕陽逗浦月歸途興悠悠迴看嵐彩
飛還上西南樓

游半月泉館蘇玉局題壁

常把月泉吟遙愛山泉冽垂葛纜扁舟始識泉如月持
杯一飲之五內金沙發一飲肌體輕再飲毛羽潔三飲
朝玉京仙真導鸞節如何春草生長與名藍別昔聞刺

史賢政成休沐出往往登嶺頭白雲自怡悅我今摩崖
還苔深銘字闕詎若墮淚碑湘江久磨滅

七里瀨作

澄江碧若凝寒山與之一回矚來時嶺已見彩虹滅
晶望何歸澹澹坐起忽緬懷披裘翁乘槎釣明月中流
指雙臺高風邈未歇雨洗楓林清猿嘯島藤絕日暝迴
我艫鐘落遙天末

題洞庭山

家住霅溪口遙望洞庭山嘗見碧雲起雨色飛人間悠

悠借漁父夙昔之霞關挂席愛曉日迴洲羨白鷗滄波
幾遡涉乃登明月灣漸聞雞犬喧松竹幽且閒愧我非
園綺無由巢阿端鐘聲援蘿去桃花藉草斑探討與何
已十日不言還

耶溪還舟

解纜耶溪上俄逢桃花林不知從此去白雲幾許深入
丁聞寒溜層層隔遙岑歸家月正好孤坐擁瑤琴彈入
松風裏猶然山水音

秋日述懷

借問八荒間何以固吾寶綠縟惜秋暉無過田園好昔
人北窗眠坦腹摛幽抱珪組豈不懷壯年曾聞道偃蹇
臥煙蘿植援事黎棗帶索散垂腰芳醕每自倒向來多
暇日尙欲恣遐眺玩月愛赤城濯足思蓬島寄言同心
者領意在天表

宿揚子津寄宜城劉雲

想君吟詠佳灑落敬亭雲繁余客揚子清興邈未聞鼓
琴濠中流望望日已曠寒鴻自嘹唳衝霞不及羣勞佇
悲獨酌鄉心越江濱夢搖清溪月潭島花紛紛

晚泊蘭谿

薄暮因旅游，暫有煙景憩。了了見金華，歷歷明遠霽。灘聲聒已寒，江縣殊迢遞。華星雲間曙，遙岸蘿門閉。參差何人吹，淒清一以厲。擁楫漫徘徊，不覺愁思至。官燭邀僧話，還宿天華寺。

清秋金吾朱公兆憲邀同諸君攜酒龜山觀海

昔覽山海圖，已識山海好。左盼凌崑崙，右顧窮蓬島。今茲戊戌秋，而來恣遐討。同趣四五輩，攝屐龜山曉。白鳥飛不下，黃花吹嫋嫋。相望欲乘流，沿洄遡浩淼。崩騰潮

始來轉覺天地小，畢景神彌清。扶醉心愈皎，迅風聞樵
唱。款憶長者道，何當逢月滿。復俯眾松杪。

晚秋滯山陰與朱四祁六二生

世網多拘檢，此心澹無涯。霜吹葛屨輕，仍汎貫月槎。貫
月徑窈窕，意得興轉加。遂有鵝鼻游，沿流溯若耶。傍潭
暗竹篠，幽嶼明灘沙。鐘傳何處寺，縹緲隔絳霞。人生百
年間，荏苒摧光華。況泛濟時用，羨此山水遐。疏逢習鑿
齒，風流得孟嘉。吾欲依二子，白雲以爲家。

宿千松禪院待錢大纘曾不至

好雨何處來灑灑葉上涼
俄然紫閣霽羣壑迴清暘
喧寂兩豁如髮几隱鑪香
飲虹捲瀑落飛燕拂雲翔
趣滿雁子堂逸興爲誰長
息居心已悅慕道機則忘
閒階宿松桂俯澗媚菰蔣
引領意婀娜臨風曳明璫
佳期桃林岸孤帆悵蒼茫
空餘東嶺月蘿壁搖寒光

曉發采石懷李白

楓生浦淑暗楓落客子憂
挂席聞雞唱迎旭見霞流
氣象迴然爽迴望西嶺幽
蒼翠弄無已翻飛下白鷗
采采舉芙蓉何處是芳洲
朗吟謫仙句欲與天上游
天上不

可見雲關增我愁
還乘大江月
嘯登黃鶴樓

趙瀚宅聞琴卻贈

雨霽春江綠
搖鞭玩芳菲
昨者趙瀚宅
何人彈玉徽
曠聞伯牙心
耿耿如可依
賞酌不言醉
流盼送清暉
桃花發湖浦
白鶴西山飛

汎太湖泊銷夏灣曉行有懷

持竿何嫋嫋
嫋嫋下洞庭
舉酒醉夕陽
孤霞繼明星
曠然煙波上了
見遠峰青
緬思美無度
縹緲越蕪城
別浦桃花宿
春風沙鳥鳴
曉夢東山人
悠悠著屐行

雲門尋雪厂上座

古之寶掌寺幽幽雲門中尋游不道遠溯筏指飛鴻陟
巖識巢居飲澗窺蝶竦樵夫引歸路乃至青蓮宮微言
有真契宛見君子風如何笑別處日出東林東

九月浦陽江聞蜀人楊太常能彈琴客淮南作西
方風木二操遙有此贈

鴻飛江上洲渺然秋意長雲木鏡中落浩浩流煙霜孰
是峨眉客玩此淮南芳天邊遙有憶孤舟繫夕陽猿狖
晚驚嘯橘柚寒青蒼獨酌板橋下微吟多勞傷

爛柯山卽事寄烏程沈四充煒

歡言酌酒時渺渺隔雲闕豈無潮可乘翫此江上月金
橘皎流霜陰崖驚栖鶻離思東南飛蒼然滿吳越

重過雙髻峰蘭若懷□□□

白雲在南山攬之無由得輕舉今再停密笥蔭猶黑仰
窺巖上溜臨軒灑何極暗葉眠麝香陽葩耀丹棘畢竟
漾春愁揮塵有初憶終念古先生留此煙霞宅

君山望江懷族弟允柎臥疾

獨酌青山上忽念贈珠人抱疾空房裏臥送桃花春昨

寄一封書猶聞滯關津江清波若鷗天迴樹疑雲海日
廣陵遠何處望夫君

和祁六泛舟問田家作

稔聞操雅興清晨起櫂沐往往越鏡湖愛向白雲宿有
時或捨艫遙望中田屋茅茨吹寒犬煙虹散翠竹蕘
進薯蕷漁尊泛醞醪日見桃源人長年意彌足余亦幼
安流每夢茗溪綠行當挂篷還醉倒東籬菊

杪秋戲柬祁五

秋風客未歸籬菊已堪把昨日傾玉壺醉後還騎馬問

君能再邀試掃竹林下

聽美人彈琵琶

美人玉指寒雲和聲未歇一曲春風生園林花盡發分
明苧蘿溪猶見吳宮月

憶何山寄元禪師

醉臥雲門月何山隔暮曛猿嘯巖花落谿流寒不聞想
見參寥子時時弄白雲

舟行

淪老客煙波孤帆洞庭水霜花明驛樓珠女游江汜夜

行楚雲間光景兩奇美月寒吐巴山秋猿嘯未已夜夜
夢還家枕上數千里披衣拂綠琴沅湘清風起

三妙軒酬王二詞槐

疏雨鳴碧瓦晨氣靄青蒼山中洗耳翁吟興一何長庭
槐無繫馬脫帽憑隱囊逍遙注纔畢華嚴疏復詳還愛
蘇玉局意得自相羊挂瓢吹漑漑不覺對斜陽鷓鴣下
衣桁松花落筆牀翹首薊門客流翰飛清光欲報瑤華
嬾三閱春郊芳

宿州山吳二卿禎宅卻贈

薄霽開華林須臾返照紫臨流明濯足隱者自爲美翠
嶺寒禽喧蕪階霜葉委憶昨別來久君懷尙如此汎菊
盈佳興羅尊甘且旨歡謔滌塵襟笑言殊未已悠悠
頂期望望白雲裏獨有煙波客日夕渡江水

雪翁詩集卷一
五言古